

Presidente John Jeandor ta indica

ASOMA A HAYA PERMISO PA ORGANISA FESTIVAL DI CALYPSO Y TUMBA

ORANJESTAD(AAN) -- E aña aki ASOMA mes ta organisa festival di Calypso, Roadmarch y Tumba.

Redaccion di DIARIO a drenta den contacto cu presidente di ASOMA, John Jeandor, kende a duna di conoce cu ASOMA a ricibi e permisonan pa organisa e festival di Calypso tanto pa mucha como hende grandi y tambe festival di Tumba tanto pa mucha como hende grandi.

Ta asina cu na October 1993, ASOMA a reuni cu Ministro di Husticia, Croes, caminda ASOMA a presenta su peticion pa organisa e festivalnan ariba mencionada.

E motibo cu ASOMA mes kier organisa esakinan, ta debi na e problemanan cu e asociacion tabatin cu SAC. Dia 30 di November ASOMA a dirigi su peticion na Ministro di Husticia y a concede directiva di ASOMA e peticionnan.

ASOMA ta agradecido na Ministro di Husticia pa e hecho aki.

Directiva di ASOMA ta haci un apelacion na tur musiconan pa un reunion Diarazon awor 5 di Januari pa 7'or di anochi na Entertainment Center.

Den e reunion aki tur e musiconan cu ta bay participa pa tanto Calypso como Tumba por inscribi. Tambe ASOMA ta haci un

apelacion na tur muchanan cu ta desea di participa pa Calypso por tuma contacto cu Elgin Juddan y esnan cu ta desea di participa pa Tumba, por drenta den contacto cu Vicente Kelly.

Elgin Juddan y Vicente Kelly ta e personanan encargados cu e dos festivalnan aki.

Redaccion di DIARIO a puntra Jeandor cu awor cu nan tin permiso pa organisa e festivalnan, si esaki lo no trece friccion entre ASOMA y SAC.

Jeandor a indica cu ASOMA a reuni cu e bandanan musical y te asina leu cu ASOMA sa, ningun banda lo bay participa cu SAC.

ASOMA lo no bay coopera cu SAC tampoco den ningun evento musical cu SAC organisa. Esaki segun Jeandor ta debi na e trato cu ASOMA a haya for di SAC. E presidente di ASOMA ta haya cu no mester trata hende di e manera cu SAC a trata nan.

E ta referi entre otro na e carta cu SAC a manda pa ASOMA dia 27 di Augustus 1993 caminda SAC ta bisa cu ta nan mes lo bay organisa tur cos y cu nan no tin mester di ASOMA, ki-brando asina e acuerdo cu ta existi entre e partidonan.

Jeandor a enfatisa cu ASOMA, un organisacion cu ta respeta su mes, no ta tolera ni acepta ningun tipo

di decisionnan asina tuma.

Ta asina cu tanto SAC como ASOMA tin nan fecha stipula pa e festivalnan.

Jeandor a indica cu ASOMA a calcula e eventonan aki for di basta luna atras, promer cu SAC a traha su programa, ya e asociacion di musiconan tabatin esaki den mente.

ASOMA ta organisa su Calypso contest pa hende grandi, Diasabra 15 di Januari mientras cu esun di mucha lo ta Diadomingo 16 di Januari.

E festival di Tumba lo ta Diasabra 22 y Diadomingo 23 di Januari. Debi cu e tempo ta hopi corto ya cu 13 di Februari ta parada di hende grandi, ASOMA a dicidi di tene Calypso contest di hende grandi ariba un solo dia.

Pa loke ta trata e Tumba contest ta asina cu esaki lo bay tuma lugar den Entertainment Center. Jeandor a splica cu ya ASOMA a hiba combersacion cu Entertainment Center.

Actualmente e permisonan pa eventonan aki ta den tratamiento y asina ASOMA haya esaki, lo bay firma un contract cu Entertainment Center.

E presidente di ASOMA a indica cu e lo bay pidi un permiso pa por termina Diasabra 22 di Januari mas laat cu e ora usual di 12'or di anochi.

Mirando cu ta trata aki di un evento pa musiconan y bandanan local, ASOMA ta spera cu lo haya comprension di parti di habitantenan den vecindario. ASOMA sa cu tin un decision di Juez cu ta prohibi pa tene actividad mas laat cu 12'or di anochi. Sinembargo, como cu ta trata di un solo dia y cu ta ariba un Diasabra, ASOMA, ta spera di haya comprension di e habitantenan.

ASOMA NO TA PERHUDICA CARNAVAL: Pa aclarea cualkier mal comprendemento, Jeandor a indica cu ASOMA no ta boycotea

Aruba su carnaval.

El a splica cu pa loke ta trata e diferente paradanan, cada grupo ta cera contract cu e banda cu e ta desea. ASOMA no tin nada contra esaki.

Jeandor a indica cu si SAC kier pa bandanan musical toca pe, e tin cu page adelantada y no despues. ASOMA tin experiencia caba cu e cuenta cu SAC ta bin cune, cu ta paga despues.

Segun ASOMA, musiconan ultimo añanan tabata e mula cu tabata lastra e garoshi pa otro haya. Awor ASOMA kier haya loke e musiconan a produci.

ASOMA solamente kier tin e festivalnan ariba mencionada pa asina e musiconan tin un entrada y nan mira un recompensa pa tur e sacrificianan cu nan a haci. Segun Jeandor, e premionan pa e festivalnan aki, seguramente lo bay ta mas atractivo cu e añanan anterior.

E pregunta grandi ta, SAC lo bay acepta esaki. Seguramente na radio emisoranan lo bay scucha e presidente di SAC habri afor contra ASOMA. Señores, kico ta

pasando cu carnaval di Aruba? Ta parce cu tur aña ta e mesun programa ta haci un copia di dje y haci algun cambio y tur cos ta cla. Pakico tanto pleitamento. Cu pleitamento asina, ta kibra so tin chance di kibra e carnaval di Aruba. Mientras cu nos mesun hendenan ta pleita cu otro encuanto permiso pa organisa evento, otro paisnan si ta sigui bay dilanti y nos ta keda atras. Aña pasa a lanta Comision di Buena Voluntad, cu a presenta proposicionnan interesante pa adelanto di nos carnaval. Ta tipo di comisionnan asina Aruba mester pa hiba e carnaval dilanti. Lamentablemente por nota cu diferente proposicion di e comision aki no a cay den bon tera cerca SAC. Ta parce cu ta SAC so kier tin monopolio ariba carnaval y no kier haya conseho tampoco con pa haci esaki mas mihor.

Ta di spera cu e aña aki, Aruba lo celebra su di 40 carnaval en grande y cu si tin mester, bin cu e cambionan necesario pa e buena marcha di nos carnaval.